



13
1787
29



門 4 3
號 1787
卷 29



尚書省



類聚尚書省唐虞大麓之職也注大錄萬機之政周官司書鄭

玄云若今尚書秦時少府遣吏四人在殿中主發書故謂之尚

書尚猶主也尚書令尚書僕射尚書丞唐制尚書省都堂居

中左右分司堂東西凡二十四司分曹共理堂東有吏戶禮三

統之西有兵刑工三行宋尚書省掌六曹諸司文書施行制命

大元置尚書令左右丞相及平章事二人任宰相之職其屬有

左丞右丞及參知政事二人為宰相之貳又有左司右司各有

員在外別置行省

漢書張安世以父任為郎天子行幸河東嘗亡書二篋詔問莫能知唯安世識之後購求得書以相授無所遺失奇其材擢為

尚書令

安世謂尚書職典樞機以謹慎周密自著外內無間
昔有所薦其人來謝安世以為舉賢建能豈有私謝耶
絕弗復通有即功高不調自言安世應曰君之功高明主
所知人臣之事何長短而自言乎絕不許已而即果遷

後書光武親總吏職天下事皆上尚書與人主參決乃下三府

尚書令為端撰之官

江總表昔之象
司今日端撰

尚書令主贊奏事總

領紀綱無所不統與司隸校尉御史中丞朝會皆尊席而坐京

師號曰三獨坐

左雄為尚書令限年四十九先試經然後

舉孝廉故雄為令在位者各肅清時稱曰左伯豪為尚書天下

皆慎選舉

續漢書鄭弘為令前後有所補
益於政者皆著之為南宮故事

帝昭辨釋名曰尚上也言最在上總領之也辨云尚猶奉也百

官言事當省案平處奉之故曰尚書尚食尚方亦然

桓譚新論昔堯試舜於大麓者領錄天下事如今之尚書官矣

宜得大賢智乃可使處議持平

周禮司會中大夫三人若今之
尚書補後主冊文昌政本司會

經化

職官分紀後漢有六曹尚書并一令一僕射謂之八座魏有五

曹與二僕射一令謂之八座

侯霸字君房光武拜尚書令時無
故典朝廷又少舊臣霸明習故事

收錄遺文條奏前世善政法
度有益於時者皆施行之

本傳董卓辟蔡邕以高第補侍御史又轉侍書御史遷尚書三

月之間周歷三臺尚書漢因秦置之故尚書為中臺謁者為外

臺御史為憲臺謂之三臺唐光宅元年改為文昌臺垂拱元年

又改為都臺神龍初復舊為尚書省亦謂之南省

尚書荀彧守尚書令課試令史以下覈其才能有關於文法不

能決疑處事者即時遣出帝嘗謂曰武帝言荀文若之進善不

進不止荀公達之退惠不退不休二令君之美亦望於君也

三國志蜀費禕字文偉代蔣琬為尚書今時戰國多事衆務煩

猥禕識悟過人每省讀書記舉目覽視已究其意旨其速數倍

於人終亦不忘常以朝晡聽事其間接納賓客嬉戲博奕每盡

人之歡事亦不廢董允代禕為尚書令旬日之間事多停滯允

乃嘆曰人才力相懸若此非吾所及

晉書太熙元年詔曰夫總百揆之得失管王政之開塞者端右

之職也自漢以來每選此官常慎其人議郎王戎清儉履道勲

著歷試其以戎為尚書令春秋合誠圖曰天理在斗中司三公也如人喉在咽以理舌語

晉宗室會稽王道子進位丞相錄尚書假節都督中外諸軍事

勢傾天下道子世子元顯又加錄尚書事道子政無大小一委

元顯時謂道子為東錄元顯為西錄

山濤啓事尚書令李胤遷處缺宜得其人征南將軍羊祐體儀

玉立可以整肅朝廷征南將軍衛瓘真正靜一中書監苟勗達

于事物三人皆民望不審可參舉否

康帝詔尚書萬事之本朕所責成也而廩秩儉薄甚非治體今

雖軍國多費不為元凱惜祿其依令僕給尚書各親信五十人

廩賜

謝靈運書古者重武事貴射御取其捷御如僕各置一人尚書

六人謂之八座參攝百揆出內王命古元凱之任謝石辭表尚書令國之家

司總括百揆憲範王猷式是百辟

通典僕射秦官漢因之古者重武官有主射以督課軍吏成帝

建始元年初置尚書五人以一人爲僕射主封門掌授廩假錢穀後漢尚書僕射一人署尚書事周魏晉置二則左右僕射或不兩置隋文帝開皇三年詔左右僕射從二品左掌判吏禮兵三尚書御史糾不當者兼糾彈之右掌判都官度支二部尚書又知用度唐左右二僕射因前代本副尚書令自尚書令廢缺二僕射則爲宰相

後漢書光武改僕射爲祭酒而又屬少府掌贊導衆事顧問應對法駕出則多識者一人負國璽操斬白蛇劍參乘餘皆騎在乘輿後

何法盛晉中興書顧和爲尚書僕射以母老固辭詔勅諭待聽暮出朝還其優遇如此尋朝議加銀青光祿大夫

宋除呂蒙正尚書僕射制邦國政治盡出於中樞朝廷紀綱皆歸於會府矧乃端揆之任聿居師長之崇苟非台鉉之賢曷慰縉紳之望具官呂蒙正挺生英氣符合昌期既光夢卜之求遂荷鹽梅之寄謨明匪解亮直不渝爰自天官再持政柄洎和鼎實時維老成

尚書左右丞

類聚成帝建始四年置尚書員五人有四丞光武始減其二唯置左右丞掌錄文書期會唐龍朔改左右丞曰左右肅機宋元祐令尚書左右丞並正二品爲執政官大元以宰相之貳佐治省事

晉書卻詵爲尚書左丞糾吏部尚書崔洪洪曰我舉卻丞而還

奏我此為悅擊自射詵聞曰昔趙宣子任韓厥為司馬厥以軍法戮宣子之僕宣子曰諸大夫可賀我矣崔侯為國舉才我以才見舉唯才是視各明至公何故斯言洪聞悅服

傳成書尚書左丞彈八座以下居萬機之會斯乃皇朝之司直天臺之管轄

梁書賀琛字國寶為尚書左丞茲參禮儀事琛前後居職凡郊廟諸儀多所創定每見高祖與語常移晷刻故省中為之語曰上殿不下有賀雅琛容止都雅故時人呼之

唐書貞觀中宇文節為尚書右丞明習法令以幹局見稱江夏吳道宗嘗以私事託於節節遂奏之太宗大悅賜帛二百疋勞之曰朕不置左右僕射者正以卿在省耳 戴胄拜尚書右丞尋遷左丞太宗謂胄曰尚書省天下綱維百司所稟若一事

有失天下必有受其弊者今無令僕係之於卿當稱朕所望也胄性明敏處斷明速議者以為左右丞稱職武德以來一人而已 白居易為校吏承宣尚書左丞制吾前命崔從持左綱

今乃命承宣操右轄無俾戴劉魏杜專美於貞觀中 漢制丞郎見二丞呼 劉洎上疏尚書萬機是為政本是以八座比於文昌

二丞方於管轄 常弘景素以鯁亮稱及拜左丞居綱轄之地郎吏望風修整 傳成為右丞丞臺閣望風自肅劉儼為右丞三臺肅清

蘇子由劉摯尚書右丞誥漢御史大夫能任其職則為丞相近世中執法議論不撓亦補執政昔我仁宗優養正士開受直言則有包拯張昇之流咸以敢言獲聞大政朕追懷先王選建忠

賢謬謬之聲庶幾前烈具官劉摯早以御史小事裕陵力陳是非不避權寵十年沉落志氣不衰召置臺端首開正論進任中司之要屢聞白簡之言風聲凜然國是以定朕欲試其行事之實是用付以右轄之權
為樊左丞讓官表尚書百揆翊亮萬機故天上尊北斗中樞陛下有南宮左轄晉升孔坦諒直當時漢拜楊喬閑練故事庶得百僚有憚於會府諸侯取法於京師臣實諛才謬登清貫

杜甫上韋左丞鳳曆軒轅紀龍飛四十春八荒開壽域一氣轉洪鈞霖雨思賢佐丹青憶老臣應圖求駿馬驚代得麒麟沙汰江河濁調和鼎鼐新常賢初相漢范叔已歸秦盛業今如此傳經故絕倫豫樟深出地滄海濶無津北斗司喉舌東方領縉紳持衡留藻鑑聽理上星辰獨步才超古餘波德照鄰

左右司郎中員外都事

類聚煬帝三年尚書都司始置左右司郎各一人品同諸曹郎從五品掌都省之職唐武德初省貞觀初復置改為郎中龍朔二年改為左右承務宋朝以為階官元豐正名始實有職掌左右司郎中各一人員外郎各一人凡四員掌舉諸司之紀綱號為都司元豐六年都司置御史房主行彈劾御史按察失職紹聖初詔都司以歲終點檢六曹稽違太多者其姓名取旨大元左司掌察吏戶禮三部受事傳事右司掌總察兵刑工三部受事傳事各置郎中員外郎都事其屬有祇候郎君架閣庫管勾等人 都司本尚書都令史之職令史蓋前漢官也漢尚書臺

令秩三百石晉尚書都令史八人秩二百石與左右丞總知都臺事隋開皇初改都令史為都事大元於左右二司各置都事亦古制也二十四曹呼左右司為都公

漢官儀太尉司徒司空長史秩比千石號為毗佐三台助鼎和味崔寔曰三公天子之股肱掾屬三公之喉舌

唐書天后永昌元年始置左右司員外郎各一人時顧琮自侍御史陳元懷真以洛州司戶其朝服與諸司員外郎並爵弁玄纓簪導青衣纁裳一梁冠 向敏中字用晦為左司員外郎

武宗雖聞白居易名欲召用之是時居易病足宰相李德裕薦敏中文辭類其兄而有器識 許鑑為左司郎中不稱職張

鷲劾之云位膺列宿爵綰通班總八座之繁司承萬機之要務鏘鏘會府掌北斗之璣衡肅肅禮闈握南宮之樞奧

哲宗實錄王震字子發元豐四年開天章閣初用官制大除拜詔震與吳雍輔臣執筆入記聖語面授右司員外郎直使自書

除日時論榮之長編元豐六年七月左右司郎中范雍直龍圖閣河北運轉使都司出使除職自此始元祐元年

會要紹興十三年三省擬進右司郎中上謂輔臣曰神宗聖訓云左右司便是學為宰相豈可不謹擇

續會要宣和二年臣寮疏神考肇建中臺分六官而設之屬以御史糾其稽違復令都司等其功過令史左右司歲考六曹郎官治狀以功過對所分等惟三

晦菴集張維字振綱嘗為左司郎中遇事有未便輒詣都堂坐

白或曰瑣瑣辨切非朝官體公曰都司助調鼎實與微所關若視吏籤擬輒涉筆書不置可否安用我輩耶

門下省

類聚環濟要畧侍中古官也或曰風后爲黃帝侍中周官時號常伯者言其道德可常遵也秦始皇復古冠貂蟬漢因而不改比內官侍帷幄受顧問拾遺於左右出則負璽以從小則參乘秩二千石

通典漢侍中中常侍得入禁中舊用儒者然貴子弟榮其觀好至乃襁褓坐受寵位貝帶脂粉綺繡紈袴鷄冠直侍左右分掌乘輿服物下至褻器虎子之屬武帝時孔安國爲侍中以其儒者特聽掌御唾壺朝廷榮之本有僕射一人註秦漢以侍中

功高者一人爲僕射

沈約宋書漢使左右曹諸吏分奏尚書事先武省諸吏使小黃門受事前代文士皆謂門下爲左曹亦曰東寺

初學記侍中冠武弁大冠亦曰惠文冠加金璫附蟬爲文貂尾爲飾謂之蟬貂應邵云金取堅剛百鍊不耗蟬居高食潔自在腋下貂外勁悍內溫潤

唐書魏知古拜黃門侍郎時盛夏造金仙玉真觀工程嚴促知古切諫睿宗嘉其直罷之開元初卒宋璟嘆曰叔向古遺直子產古遺愛兼之者其魏公乎

初學記董巴漢書禁門曰黃闥中人主之故號黃門令然則黃門郎給事於黃闥之內入侍禁中故曰黃門侍郎齊職儀曰初

秦有給事黃門之職漢因之自魏及晉置給事黃門四人與侍
中俱管門下衆事與散騎常侍並清華代謂之黃散焉

程頤賀門下許侍郎顯膺綸綍進貳機衡東臺地峻左省班清
六部尚書

王世貞曰尚書非周官也自秦寄國事於丞相而內庭有尚書
其爲令丞不可攷但其職僅以通章奏而已漢興至武帝而始
削丞相權躬自攬斷而設中書令以參尚書至臨崩而始命大
將軍霍光領尚書事裁斷萬機可否保護萬乘兼寓宮禁而九
卿將軍守相所諮白不之丞相而之大將軍至大將軍王鳳而
後脩光故事權至佯人主丞相取充位而已成帝始置尚書令
各一人尚書四人凡四曹曰常侍曹二千石曹民曹客曹後又

至四直三公曹是爲五曹然不過一大將軍祿屬而已後漢光
武不以政委三公天下章疏皆尚書與人主叅決乃下三府而
至孝明以後凡天子初卽位輒置錄尚書事以太傅居之或以
太尉叅之然時置時罷而令僕射及尚書號八座其可否庶務
卽今之內閣而案考功法詰責公卿又有今所不敢望者然令
秩不過千石僕射八百石尚書六百石銅印墨綬令以久次始
得爲郡守用望遷九卿而尚書至有補太縣令者以故委寄雖
尊而不敢萌肆心至魏晉時令僕不出爲他官往往徑爲三公
如山濤衛瓘或領開府如荀勗而居然端揆自命矣魏分尚書
五曰吏部左民客曹五兵度支晉分爲六曰吏部五兵客曹駕
部屯田度支而尚書始以其職入街矣渡江後定爲吏部祠部

五兵左民度支凡五歷宋齊梁陳又加都官爲六當是時六尚書雖分寄省事於令僕不稱屬而吏部尤重沿至北齊周隋有錄公則錄爲真相而令僕爲叅執無錄公則令爲真相而僕射爲叅執無令則僕射真相矣而中書主奉行門下主封駁與尚書省次體而爲叅執唐自太宗爲尚書遂罷令不復置開元初改左右僕射爲左右相姑美其名以爲侍中中書令優老之階而歸重於文武二選其後遂以中書令爲右相兼文部尚書而李林甫楊國忠居之左相兼武部尚書而李適之陳希烈居之至德以後侍中中書令復以重故爲勲臣加秩而一侍郎同平章事爲真相資望之深重亦有至中令侍中者其左右僕射或以爲加秩或以爲優資宋初以至元豐政和淳熙宰執之更改

不常而六尚書之係尚書省如故元制中書省令丞相平章左右丞叅政以釐天下之務而吏戶禮兵刑工六尚書爲曹官

明高皇帝下江南卽置行中書省自領之卽吳王位改置中書省而於六尚書勢不遑設洪武元年始備六尚書皆正三品而侍郎正四品郎中以下品秩有差而皆隸中書省一仍元舊十三年丞相胡惟庸以專擅蒙蔽誅分其職於吏戶禮刑工兵部分大都督府爲五而攝其樞要於兵部陞尚書正二品左右侍郎正三品蓋隱然周世六官之嫩而獨家宰不制國用司徒不掌邦教以此小異耳 文皇帝卽大位而悉更從洪武之舊改北平故燕國爲北京設行部尚書以總布按二司事行都督府總都司事永樂四年 上狩北京 皇太子以元良監國大小

庶務悉以委之是時六部政本猶在南十七年而皇太子歸
 青宮以皇太孫留守南京六部政悉移而北十八年行在六部
 落行在字諸九卿大小省署之留者皆稱南京洪熙元年天
 子留意豐鎬諸九卿大小之在南者皆落南京字而六部復稱
 行在宣德三年始定如永樂弘正以還內閣日益重而六尚書
 日益輕然老臣勲業稍重加三孤東宮三師若吏兵之長猶能
 與之抗至分宜之得政則若外藏矣江陵之當國則若曹郎矣
 嗚呼人主不可以太阿授人哉

弇州別集 國朝父子並至尚書者吏書翰林學士承旨詹公

同太子少保吏書兼左都御史微同見任時尚書只是三品今其各職皆作尚書故記之

太子太保吏書何公文淵刑書喬新少保吏書謹身大學士王

公文南禮書宗彝刑書耿公九疇太子太保吏書裕南刑書周

公瑄太子太保禮書經南禮書倪公謙太子少保吏書岳刑書

施公禮太子少保禮書掌鴻臚寺事純太子少保兵書白公圭

太子少保禮書翰學士鉞太子太保吏書王公恕南戶書承裕

南工書侯公瓚戶書觀太子少保吏書許公進南戶書誥少傅

太子太傅吏書文淵大學士讚太子太保兵書論南兵書林公

翰太子太保工書庭梈南禮書庭機南吏書王公華新建伯南

兵書左都守仁南刑書吳公洪刑書山戶書李公瓚太子賓客

戶書翰學廷相太子少保刑書劉公璟刑書訥南工書何公詔

刑書鰲少師太子太師吏書楊公博戶書俊民南禮書孫公陞

南吏書鑑左都御史王公忬南刑書世貞少保太子太傅禮書

武英大學士陳公以勤禮書東閣學士于陞凡二十三家四十
九人內詹許俱太宰倪氏俱學士林氏俱司成陳氏俱內閣又
朱復為燕府左相位尚書上而子濟為刑書楊公博為少師而

次子俊卿至都督同知雖文武異途然俱腰玉皆可紀也祖孫尚書

工書薛公祥南兵書遠工書王公永壽吏書瓊兵書孫公原貞

吏書需戶書劉公中敷吏書機兄弟尚書南工書蔣公昇少

傅太子太傅戶書謹身殿大學士冕太子少保戶書石公珮少

保太子太保吏書武英殿大學士珪南戶書許公誥少傅太子

太傅吏書文淵閣大學士讚太子太保工書林公庭揚南禮書

庭機南禮書林公燦南工書煙係親昆季按許氏既三人而以

傅宮保復腰玉尤人間所希少保吏書文淵閣大學士彭公

時太子少保禮書翰林院學士華少師太子太師吏書李蓋殿

大學士費公宏少保太子太保禮書翰學案工書掌大理寺楊

公守隨南吏書守吐南禮書李公機南兵部尚書遂係從昆季

總侍郎

富大用類聚初秦置侍郎無員分隸三署主執戟侍宮殿出則

克車騎漢因之侍郎秩四百石以其為郎內侍故曰侍郎侍郎

六卿之副凡諸郎掌更直執戟宿衛諸殿門以侍衛之故通謂

之侍郎武帝時東方朔為郎後揚雄為侍郎當時謂之官不過

侍郎位不過執戟是也尚書亦有侍郎初入臺稱郎中滿歲稱

侍郎梁尚書郎入臺功高者轉為侍郎隋煬帝二年尚書六曹

各置侍郎一人以二尚書之職並在第四品今之侍郎其置自

此始又改諸司侍郎但曰郎吏部為選部郎禮部為儀曹郎兵

部為兵曹郎刑部為憲曹郎工部為起曹郎以異六侍郎之名

唐武德六年廢六司侍郎貞觀二年復又降為正四品下惟吏

部侍郎為正四品上咸亨二年復為侍郎總章元年吏部兵部

各增侍郎一員宋以為階官至元豐官制行始有職掌元祐二

年初置權侍郎從四品如未歷給事中中書舍人及待制以上者茲帶權字祿賜比諫議大夫崇寧罷權侍郎建炎四年復置大元仍之置六部侍郎

唐百官志侍郎掌貳令之職朝廷大政參議焉臨軒用命為使則持冊書授之四夷來朝則授其表疏而奏之獻贄幣則受之以付有司

冊府元龜周歷五曹之副建明萬事之本中臺政本思舉舊章六卿貳職今之盛選

類要侍郎自皇朝以來為衣冠之華選自非履歷清要望實具

美者無以居之

播芳集賀中書林侍郎顯被制書進參機務綴詞臣於鰲禁訂國論於鳳池

李白詩客曹與天通出入清禁中君登金華省我入銀臺門

愈詩徵入中臺作侍郎黃山谷詩紫府侍臣鳴玉佩

弇山集國朝父子至三品九卿者劉翰學朱公升子禮侍大同

兵侍鍾公勗戶侍永吏書趙公好德工侍毅戶書王公鉞戶侍

淪工侍陳公壽戶侍常禮侍儀公智太子太保兵書銘工書黎

公澄右侍叔林禮侍蔣公驥左副都琳工書畢公亨右副都昭

少師太子太師吏書華蓋大學士萬公安南禮侍翼兵書兼大

理卿程公信禮侍翰學贈尚書敏政戶侍李公暹南戶侍益吏

侍揚公守陳刑侍茂元南吏書王公儼右副都沂太子太傅刑

書白公昂右副都圻右副都李公介兵侍昆少傅太子太傅戶

書謹身大學士謝公遷吏侍翰學丕南禮書江公瀾工侍曉兵

侍遠公鏞左副都憲右副都憲禮書劉公春右副都彭年南工

書董公越大理卿天錫右副都王公珣右副都崇文右副都孫
 公懿禮書陞都御史劉公洪右副都臬刑書楊公志學兵侍守
 謙太子太保兵書王公憲右副都汝孝兵侍陶公諧右副都大
 順吏侍大臨少師太子太師史書華蓋大學士嚴公嵩工侍世
 蕃以高刑侍劉公玉南工侍慈右副都吳公濟通政使三樂兵
 書王公邦瑞南刑侍正國大理卿汪公文盛南吏書宗伊署兵
 書李公燧僉都御史材亦可附見

總郎中

類聚初秦置郎中令其屬官有三署五官中郎將左中郎右中
 郎將凡三署署中有郎每員多至十人分隸三署主執戟侍官
 殿出則充車騎漢因之郎中之名猶因三署本號置尚書郎四

人分掌尚書事時馮唐為郎中署長光武分尚書為六曹每一
 人尚書則領六郎凡三十六郎自漢以來尚書諸曹郎中侍郎
 或不兩置魏自黃初改秘書為中書置通事郎掌詔草而尚書
 郎有二十三人非復漢時職隋以諱忠不置郎中煬帝改曰郎
 唐改為郎中龍朔改為大夫宋元豐官制行郎官理郡守以上
 者為郎中大元六部各置郎中常製制郎官古之元士天下之
 務多所開決其於損益大矣
 漢畫郎官故事令郎出錢市財用給文書廼得出名曰山郎移
 病盡一日輒償一沐或至歲餘不得沐其豪富郎日出遊戲或
 行錢得善部貨賂流行轉相放效楊惲為中郎將罷山郎移長
 度大司農以給財用其疾病休謁洗沐皆以法令從事類要黃
 香為尚
書郎常獨止宿臺上晝夜
 不離省闈帝聞而善之

漢官儀尚書郎伏奏事黃門郎對揖跪受故稱尚書懷香握蘭
趨走丹墀主作文書起草書夜更直五日於建禮門外入直官
給青練白綾被或以錦被給帷帳茵褥通中枕太官供食物湯
官供餅餌及五熟果實之屬五日一美食下天子一等黃門郎

日夕入對青瑣門拜山啓事舊選尚書郎極清望也裴度奏臺
郎皆朝之俊選潘岳贈陸機優游省園珥

筆華軒 宋時諺吏對考三藝兩嫂尸度金舍細酒肥羊禮
同主膳淡爽藝楚兵職駕車交蓋押醋刑都北門人肉餽鮑

三輔決錄馮豹為尚書郎每奏事未報常伏省署或自昏至明
天子默使人持被覆之田鳳字季宗為尚書郎容儀端正入奏
華靈帝目送之因題柱曰堂堂乎張京兆田郎

晉天文志郎位十五星在帝位東北一曰依烏郎府也三省郎

中是其職也史注大微後二十五星郎位也楊國忠制往日星
郎爰秉大憲蘇味道詩遠從南斗外遙仰列星文

晉書索靖子緄字巨秀少有逸辟之量靖每曰廊廟之才非簡
札之用州郡吏不足汗吾兒也舉秀才除郎中 樂廣為尚

書郎與何晏鄧颺等談講確見而奇之曰常恐微言將絕今復
聞之命諸子造馬謂曰人之水鑑也每見此人瑩然如披雲霧
而覩青天

通典粉署郎署也以諸郎官握蘭含香故云馨香又謂之畫省
以粉畫之故言粉署又省中皆以胡粉塗壁畫古賢烈士以丹
朱漆地故謂之丹墀漢尚書郎月賜赤管大筆一雙喻麈尾一

九職類宜正列星之次俾承賜筆之寵杜
馨香粉署研蘇軾鷄舌還應共賜香

通典晉尚書郎選極清美號為大臣之副虞詡曰臺郎顯職乃
並仕之通階元微之制嘉乃令子為吾望郎蘇軾詩東川得

望郎坐與西爭重 故事叔父兄弟不許同省為郎然官格
 令不載亦無正勅正觀二年常叔謹除刑部員外郎三年常季
 武除庫部郎郎中太宗謂曰知卿兄弟近任尚書省故授卿此
 官欲成一家之美無避稍屈資也其後同省者甚多近日非特
 恩除拜即須相回避也

兩京新記尚書郎自兩漢已後妙選其人唐武德貞觀已來尤
 重其職吏兵部為前行最為要劇自後行改入皆為美選考功
 員外專掌試貢舉人員外郎之氣望者司門都門屯田虞水膳
 部主客皆在後行間簡無事先天中王上客為侍御史自以才
 望清雅妙當入省常望前行忽除膳部員外郎微有悵惋吏部
 郎中張敬忠戲詠之曰有意嫌兵部專心望考功誰知脚踏燈

却落省牆東膳部在省中氣東北隅故有此句

牙百官志尚書郎入直官給帷帳氍毹侍史二人選端止妖麗

執香爐護衣服奏事明光殿 白樂天賀楊十二新拜省郎詩文
 昌新入有光輝紫界官牆白粉闌
 曉日鷄入傳漏箭春風侍女護朝衣錢起詩粉署花懸入用霄
 紫詰垂直廬驚漏近賜被覺霜移蘇味道詩明光共待漏清覽
 各址
 雲

新書趙華早擅高名累經貶謫入仕三十年方霑省官

總員外郎

類聚晉宋尚書省置員外郎分判曹事隋開皇三年尚書二十
 四司各置員外郎一人謂本員之外復置郎也掌其曹之版籍
 侍郎闕則釐其曹事此今員外郎所由始也唐尚書諸曹各置
 員外吏部置二人龍朔咸亨光宅並隨改復宋元豐官制六曹

郎官理郡守以上資任者郎中通判以下資序者為員外郎雖理知州資序未嘗實歷知州及監司開封府推判官者止除員外郎大元六部各置員外郎

通典注歷代尚書郎各以曹名為稱首或謂之侍郎皆無員外之號前代文傳及職官要錄或有言員外郎散騎侍郎耳非尚

書之職也惠帝紀注外郎散郎也韓文盛山十二詩序常侯以考功副郎守盛山胡文恭行王稹制任外郎之員承

詔曹之務

總主事

通典主事二漢有之後魏於丞相尚書諸司置主事令史隋於諸省又各置主事令史員煬帝三年並去令史之名但曰主事

漢光祿勳有南北庭主事三署之事於諸郎之中察茂才

若范孟博者豈宜以公禮格之蕃乃謝之
後漢范滂字孟博自光祿四門遷光祿主事時陳蕃為光祿勳滂執公儀詣蕃亦不止滂投板而去郭泰聞之曰

弁州別集國初官制後革者記之以備考而人亦附焉中書令不設左右丞相正一品平章事從一品左右丞正二品參政從二品參議正四品以李善長徐達常遇春張瑄等為之尋置四輔官以耆儒王本杜祐龔敷為春官杜敷趙民望吳源為夏官惟秋冬官缺以本等攝之置太醫院改為宗人令左右宗人正左右宗人俱正一品以秦晉燕周齊五王為之置皇太子左右率府都督同知康茂才等為之置諫議大夫以唐鐸為之置諫院左右司諫以耆儒劉垺開賢為之左右正言以耆儒趙肅何顯周為之置執法議理司以前元工書濂為之置審刑司左右詳議九大理司平允法司囚犯皆得詳駁之置考功承勅司文三監每監令一人丞二人監察御史馬亮張迥等五十六人為之置平駁諸司命翰林編脩以下春坊司直以下贊讀考駁諸司奏啓置磨勘司令以太子伴讀高暉為之置內正司正副各一人專糾內臣之有失儀者置繩愆司令丞各一員置東宮通事司令丞各一員署東宮文學趙晉為之置城門都尉一員以死事指揮劉廣子景為之君子衛居文官子姓舍人衛居武

官子姓置侍儀引進使正五品閣門使從五品以故誠意伯劉
 基子仲瑛為之樞密院為大都督府又為中左右前後五軍都
 督府使知院同知院各院御史臺左右御史大夫中丞侍御史
 治書侍御史殿中侍御史翰林院初置直學士待制應奉承設
 學士承旨講讀學士建文改講讀學士為文學博士方孝儒任
 之洪武末設華蓋殿謹身文華武英文淵東閣太學士俱正五
 品以劉仲質邵質吳伯宗朱善吳沉等為之設弘文館學士不
 言品秩劉基危素睢稼胡鉉等為之置將作卿正三品單安仁
 為之後入戶部置京畿都督運使正四品專治京師軍儲單安
 仁薛祥為之置宣徽院使正三品院崇禮為之後為光祿司卿
 最後為光祿寺從三品置太史院使正三品劉基為之改院為
 監使為令後為司天監定為欽天監正五品置醫藥提舉司改
 太醫院監正三品孫才貞為之後改為太醫院使正五品判六
 品置滁陽牧監從三品後為太僕寺置禮儀司正副後為鴻臚
 寺卿少卿置信實提舉從五品後為尚寶司正五品置營田使
 專董墾近畿田康茂才等為之置帳前總制親軍都指揮使馮
 國用朱文忠等為之又置金吾侍衛軍都護又置都尉府正三
 品蓋即今錦衣旗手衛也又置兵馬司都指揮使副等官後改
 文職降至六品猶有故銜建文元年更定官制六部尚書陞
 正一品增左右郎中正二品侍郎如故省戶部十四司為民部
 度支部金帛部倉庫部刑部十四司為詳憲部比議部職門部

都官部諸司俱去清吏二字都察院左右都御史去左右二字
 後改御史府都御史為御史大夫通政司為寺使為卿增其屬
 左右補闕拾遺各二員與大理寺卿止稱通政大理卿左右
 正為都評事司務為都典簿太常光祿太僕鴻臚尚寶俱止稱
 卿詹事府詹事曰詹事卿增賓客二員增設資德院資德一員
 資善二員其屬贊讀贊書著作郎各二員國子監增司業為二
 員省博士學正學錄增助教為十七員翰林院增承旨一員文
 學博士一員省講讀置文翰文士二館文翰設侍中革中書舍
 人職歸之文史館脩撰以下如故殿閣學士俱去太字謹身殿
 太學為正心殿學士六科省左右給事中布政司陞為正二品
 止一員去左右字提刑按察司曰肅政陞廣東鹽課司為都轉
 運鹽使司革五府斷事及稽仁稽義等官親王府增賓輔二員
 正三品左
 右長史上

吏部

類聚吏部尚書周之天官卿也漢成帝置列曹尚書四人其一
 曰常侍曹光武改常侍曹為吏部曹王選舉靈帝改吏部為選
 部魏改選部為吏部主選部事右於諸曹尚書自魏至梁茲第

三等梁定十八班班多為貴吏部尚書班十四諸曹尚書班十
 三唐因隋制吏部尚書一員正三品龍朔二年改為司列太常
 伯光宅元年改為天官尚書天寶改為文部宋張昭為尚書獨
 掌京官七品元豐官制行以審官東院歸吏部尚書左選審官
 西院歸吏部尚書右選大元因唐宋舊置吏部掌天下文武官
 吏選授勳封考察廉能出給制誥等事吏部令史分掌名頭以
 尚書為之長 吏部侍郎周之少宰漢大夫也漢以來尚書侍
 郎今郎中之任北齊陸瑒兄弟相代兵吏部郎今侍郎也隋煬
 帝三年尚書六曹各置侍郎一人以貳尚書之職並正四品以
 下銓補多歸之唐武德初因隋舊置吏部尚書掌六品七品選
 侍郎銓掌八品九品選本一員總章二年加一員以裴行儉為

之本員為中銓新加員為東銓

通典云唐列三銓尚書掌其一
 侍郎分其二尚書所掌

書銓侍郎所掌其一
 為中銓其一為東銓

宋元豐官制行以流內銓歸吏部侍郎左

選以三班院歸吏部侍郎右選侍郎從三品大元仍之置吏部
 侍郎 周太宰屬官有下大夫蓋郎中之任也秦有郎中以其
 為郎侍衛居中故曰郎中漢選尚書郎初從三署郎次補之初
 入尚書臺稱郎中滿歲稱侍郎故郎中之名猶因三署舊號後
 漢置吏部郎中職在選舉魏晉用人妙於時選其諸曹郎功高
 者遷吏部郎中歷代品級皆高於諸曹郎北齊吏部郎品正第
 四上諸曹郎品正第六上唐吏部郎中二人一人掌小選其應
 選之人以未入九流故謂之流外銓宋元豐官制置吏部郎中
 四人尚書選二人侍郎各選一人掌掌選事而分治之大元置

吏部郎中二人 周官太宰屬官有上士蓋今員外之任也宋

百官階次有員外郎隋開皇六年尚書省二十四司各置員外

郎一人以司其曹之帳籍品從第六宋尚書諸司員外郎正七

品大元置吏部員外郎二人 國朝置吏部尚書正二品及左右

侍郎正三品司務從九品文選司考功司漢曹郎二人掌天下歲盡

課史之法然其職不在尚書至光武改尚書三公曹主歲書考

課諸州郎魏有考功郎中一人貞觀以考功郎中專管貢舉開

元移貢舉於禮部元豐官制行以七事考監司以四善三最考

守令凡改服色者以年勞計之應謚者而復太常所定行狀大

元無專曹官有考選驗封司龍朔改司封大夫宋於右掖門置

院四司誥身案並集於此淳化五年始專置官司於省內凡官

誥以本司誥身印印之大元無專曹官封誥以令史分頭掌之

稽勳司周司勳上士二人注此官主封賞大典自周以來皆為

皆悉之覆定而後奏擬宋凡王公竝設郎中正五品員外從五品

命婦加勳用司勳印大元有勳科

事正六品以下五部同分理庶務焉

後漢百官志吏曹尚書典選舉齊祀屬三公曹靈帝末梁鴻為

選部

魏志毛玠為吏部尚書無敢好衣美食者魏武嘆曰孤之法不

如毛尚書令使吏部用心如玠風俗之易不難與崔琰並典選

舉用皆清正之士雖於時有盛名而行不由本者終莫得進務

以儉率人常乘柴車南史褚炫為吏部尚書炫居身清正

紙帽風吹 紙利若畫 部門庭蕭索賓客罕至出入左右常捧黃

盧毓為吏部尚書文帝使毓自選代曰得如卿者乃可前此諸

葛誕鄭颺等馳名譽有四聰八達之誦帝疾之詔選舉莫取有

名者如畫地作餅不可啖也盧毓曰名不可以得異人而可以

士

得常士王者正以循名按常為職但當有以驗其後今考績之法廢而以毀譽相進退故真偽混淆虛實相蒙帝納其言詔作考課法

晉書山濤為吏部尚書每官缺輒啓擬數人濤所奏甄拔人物各為題目時稱山公啓事 濤曰臣欲以却說為溫令詔可

尋又啓曰訪聞說喪母不時葬遂於所居屋後假葬有異同之議請更選之詔曰君為管人倫之職此輩應為清議與不便當裁處

世說山司徒前後選殆周遍百官舉無失才凡所題目皆如其言唯用陸亮是詔所用與公意異爭之不從亮亦尋為賄敗

鍾會見王戎裴楷總用曰裴楷清通王戎簡要後二十年此二賢當為吏部尚書莫是時天下無復滯才 王戎自居選才官進一寒素退一虛

名門調戶選隨時浮沉

通志蔡克素有格量及居選官苟進之徒望風畏憚初克未仕時山簡嘗與琅邪王衍書曰蔡子尼今之正人衍以書示衆曰山子以一字拔人然未易可稱後衍聞克在選官曰山子正人之言驗於今矣

中興書吳隱之字處默有孝行母亡每哭輒康伯母輒泣涕語康伯曰汝後若居銓衡之職當舉此輩人及康伯為吏部尚書因進用之遂歷清要

王隱書樂廣為吏部尚書所在為政無當時功譽每去職遺愛為人所思論人必先引其長屈其所短不矜而自顯人有所言過

先盡容私恕而後善惡自著值世多難清白自將交無內外任
誠保真人莫見其際者是以能自全當世以此多之語林袁真為監軍范

玄平作吏部尚書大生語素卿此段選不失護軍袁曰知何事人中作市井

南史宋廢帝時徵豫章太守蔡廓為吏部尚書廓至因北地傅
隆以聞傅亮選事若悉以見付不論不然不能拜也亮以語錄

尚書徐羨之羨之曰黃門郎以下悉以委蔡吾徒不能厝懷自
此以上故宜共參同異廓曰我不能徐干木署紙尾遂不拜干

木羨之小字也

宋書光祿大夫謝莊子肫肫子淪淪子覽覽弟舉六代五人皆
為吏部尚書茲有文集 謝莊代顏峻為吏書峻容貌嚴毅

常有不可犯之色莊風姿温美有喧訴嘗歡笑答之時人語曰

顏吏部嗔而與人官謝吏部笑而不與人官

梁書范雲性機警有識且善屬文下筆輒成時人每疑其宿構

為吏部尚書寄任隆重書牘盈案賓客滿門應答如流無所壅

滯官曹文墨發擿若神時人莫不服其明瞻蕭子顯為吏書負才氣不見凡流賓

客不與交言但舉翦一揮衣冠恨之

袁昂雅有人鑒游處不雜為吏部尚書梁帝謂曰齊明帝用卿

為黑頭尚書我用卿為白頭尚書

徐勉為吏部尚書居選官藝倫有敘嘗與門人夜集客有虞雲

求詹事官勉正色答曰今夕止可談風月不宜及公事時人服

其無私

隋書牛弘拜吏部尚書時高祖召諸儒論新禮隆殺輕重弘所

文推服之仁壽二年獻皇后崩王公以下不能定其儀注
弘曰公舊學時賢所仰今日之事決在於公斯須之間
儀注悉備素嘆曰衣冠禮樂盡在此矣非吾所及也其選舉先
德行而後文才進用多稱吏職

三國典畧東魏以楊愔典選嘗六十人爲一甲愔令其自敘訖
不省文簿便次第呼之無有誤者後有選人魯漫漢自言猥賤
獨不見識愔曰卿前在元子思坊騎秃尾草驢經見我不下以
方翹障面我何以不識卿漫漢驚服

北史辛術字懷哲遷吏部尚書遷鄴以後文襄少年高朗所弊
者疎袁叔德沈密謹厚所傷者細楊愔風流辨給取士失於浮
華惟術性尚貞明取士以才以器循名責實新舊參舉管庫必
權門閥不遺考之前後銓衡在術最爲折衷 常世康爲吏

部尚書選用平允請託不行後復拜尚書前後十餘年間多所
進拔朝廷稱爲廉平

南史張纘字伯緒大同二年徵爲吏部尚書後門寒素一介者
皆見引拔不爲貴門屈意人士翕然稱之武帝詔曰纘外氏英
華朝中領袖

唐新語唐初因隋制以吏部典選主者將親其人覈之吏事始
取州縣府寺疑獄課其斷決而觀其能否此判之始焉後日月
淹久選人滋多案牘淺近不足爲准乃採經籍古義以爲問目
其後官員不充選人益衆乃徵僻書隱義以試之唯懼選人之
能知也適麗者號爲高等拙弱者號爲藍羅至今以爲故事開

元中裴光庭為吏部始循資格以一賢愚遵平轍者喜其循常

負材用者受其抑屈宋璟固爭不得選人非負譴者皆有升無

降其庸愚沈滯者皆喜謂之聖書元脩義選吏部尚書在銓衡

價時高居者先敘上黨郡關遂求之脩義私已許人抑居不與

居大言不遜對眾呼天子賊人問居曰白日公庭安得有賊居

指脩義曰此坐上者違天子明詔物多者

得官京師白劫非此大賊乎脩義失色

分紀唐張九齡入相用嚴挺之為尚書左丞知吏部選陸景融

知兵部選皆為一時精選左晉文公作執秩以正

其官注執秩主爵之官唐書裴光庭為相兼吏部尚書與中書令蕭嵩爭權不協及為

吏部奏用循資格并促選限光庭卒嵩又奏請一切罷之光庭

所引進者出為外職時有門下主事閻麟之為光庭心腹專知

吏部過官每麟之裁定光庭隨而下筆時人語曰麟之口光庭

手

李嶠為李景讓讓天官表且夫八座位隆五曹望重典南宮之

喉舌象北斗之樞機式資藻鑒奚綜賓實自非孝先亮直彥輔

公忠山濤之簡靜篤素顧譚之心精體密何以對揚天哲厭塞

人望顧斯政本實總國彞豈臣庸愚所堪尸忝伏願迴光寢照

返汗收恩察臣由秉之請矜臣陳力之議則朝端允穆天下至

公四始輟在梁之譏六爻無負乘之累

平園集宋晏敦復為吏部尚書上嘗嘆曰敦復疑重剛方當公

介然行總有序適發清明事無奸滯山濤毛玠無以過之楊誠齋送

顏尚書聽履星辰北斗寒三台只隔寸雲

間周家冢宰均天下漢制尚書本百官

宋樓鑰謝除權吏部尚書表竊以選部持衡夙號六卿之長文

昌聽履實爲八座之聯非素推公方不足以杞吏奸非妙有德
望不足以厭輿論雖黃散之下無參異同而搢紳之流鮮不關
係宜求精敏之彥以當要劇之司

隋書吏部侍郎高孝基鑒賞機悟清謹絕倫房玄齡杜如晦與
選孝基特加賞異後以爲知人

選舉志劉林甫貞觀初遷吏部侍郎初赴選者以十一月爲始
至春即停選林甫奏請四時聽隨到注擬當時咸以爲便時天
下初定州府及詔使多有赤牒授官至是停省盡赴集將萬餘
人林甫選才銓擢咸得其宜時人以林甫典選比隋之高孝基
通典唐侍郎掌選部流內六品以下官是爲銓衡之任凡初仕
進者無不仰屬 貞觀二十二年二月文部侍郎盧承慶兼

檢校兵部侍郎仍知五品選事承慶辭曰五品選事職在尚書

臣今掌之便是越局太宗不許曰朕今信卿卿何不自信也

舊唐書裴行儉爲吏部侍郎典選有知人之鑒見王勳與蘇味
道謂人曰二子亦當掌銓衡之任後勳果爲天官侍郎味道至
相位 崔玄暉拜天官侍郎每介然自守卻絕請謁頗爲執

政所忌轉文昌左丞月餘則天謂曰自卿改職以來選司大有
罪過或聞令史乃設齋自慶此欲盛爲貪惡今要卿復舊任

席豫爲吏部侍郎玄宗謂曰卿前爲考功職事平允故有此

授豫典選六年有令譽又盧從愿精力于官僞牒詭功檢擿無

所遺銓總六年以平允聞

高唐馮爲吏部侍郎凡所銓綜時稱平允
太宗賜金背鏡一面以表其精鑒焉

會要景雲元年盧從愿爲侍郎精心條理大稱平允其有冒名

偽選虛增功狀之類皆能擿發其事典選六年頗有聲稱時人

曰前有裴馬後有盧李裴即行儉馬謂戴李謂朝隱 天官

郎中李至遠權知侍郎時有選人姓刁又有王元忠並被放乃

密與令史相知戒其點畫刁改為丁王改為士擬授官後即添

成文字至遠一覽便覺曰今年銓覆萬人總識姓名安有丁士

姓名此必刁某王某也省內以為神明 龍朔二年司列少

常伯楊思玄恃外戚貴待選流多不禮而排斥之為選者夏侯

彪所訟御史中丞即餘慶彈奏免官時中書令許敬宗曰必知

楊吏部之敗或問之對曰一彪一狼共看一羊不敗何待

唐書李乂字尚貞為吏部侍郎仍知制誥與宋璟等同典選事

請謁不行時人語曰李下無蹊徑制敕不便輒駁正貴幸有求

官者睿宗曰朕非有靳顧李乂不可過耳 苗晉卿知吏部

選事性謙柔選人有訴訟索好官者雖至數千言或聲色甚厲

者晉卿必含容之拜吏部侍郎前後典選五年政既寬弛胥吏

多因緣為姦賄賂大行 天后以許子儒為天官侍郎不以

藻鏡為意其補官悉委令史勾直時謂勾直曰平配

分紀崔沔分掌吏部十銓事以清直歷秘書監時為語曰丘山

岌岌連天峻沔水澄澄徹底清 房穎叔拜天官侍郎自其

高祖景伯至穎叔四代咸居選部時論榮之

玫瑰集孫逢吉字從之進吏部侍郎朱公燾之去公力救之侍

郎彭公龜年補外又言不應為近習而逐正人一日會食部中

或報王喜除閣門祗候公曰此乃優伶嘗於內庭效朱侍講容

止以儒為戲者豈可以汚清選當抗疏力爭否則於經筵論之
飛語上聞內批為郡

周必大謝吏部侍郎表臣聞古之銓綜存乎人今之銓綜一於
法存乎人固可以得士然其弊也嘗曰予奪之不公一於法固
可戒私然其弊也或致賢愚之同滯而况簿書紛若胥吏雜然
苟稽察之弗精將混淆而莫辨欲酌古今之中制常令人法之
並行庶稍戢於吏姦亦少伸於士氣豈容虛受以畧明揚

孫覲謝吏侍兼權直學士表臣聞虞書三載黜陟之文周官群
吏誅賞之法歷時千載分總四銓使夫人皆從容而自居則誰
當以奮發而為意攬轡而上粗有意於澄清奏刀欲前了無施
於盤錯竊慙綿力實負初心

大明會典文選司掌天下官吏班秩品命凡銓綜選授之典注
擬黜陟之法各參伍而分理之 驗封司掌百官之封爵誥勅
與夫置吏訓官給符考成之事咸綜理之 稽勲司掌邦國官
人之勲級及名籍喪制歸寧之事皆覈實然後定擬 考功司
掌文職官吏之考課及內外官之考察凡旌別訪舉及諸事故
皆得稽之

世說山濤舉阮咸為吏部郎中曰清真寡欲萬物不能移也
山公啓事吏部郎典碎事日夜相接非但當正己而乃當能正
人議郎杜黠德履亦佳太子庶子崔諒中郎陸准者有意正人
其次不審有可用者否

晉中興書阮放與從弟孚齊名為吏部郎銓官之任甚有稱譽

性清約不理產業為郎不免饑乏永嘉官名吏部郎中温嶷字元甫世論以其為人夷曠似

宋書王微字景玄吏部尚書江湛舉微為吏部郎微與湛書曰君平生云揚我名者殺我身天爵且猶滅名安用吏部郎哉其舉何陋其事不經非獨縉紳者不道僕妾皆笑之吏果之

字景行幼有孝行宋司空劉劭見而奇之謂曰見卿足使江漢崇望杞梓發聲遷吏部郎參大選

北史孝文在洛欲創革舊制選置百官謂群臣曰與朕舉一吏部郎必使才望兼允者給卿三日假又一日孝文曰朕已得之不煩卿輩也驛徵亮兼吏部郎孝明親政仍兼吏部郎亮自參選事垂將十年庶慎明次為尚書郭祚所委每云非崔郎中選

事不辨 桓彝有鑒識度意每屬之訪一佳吏部別數日

都曰吾為卿得之人所應有而不必有人所應無而不必無徐寧真海岱清士即遷吏部郎

南史何尚之字彥德以操立見稱為陳郡謝混所知與之游處為吏部郎告休定省傾朝送別於冶渚及至郡父叔度謂曰聞汝來此頃朝相送可有幾客答曰殆數百人叔度笑曰此是送吏部郎耳非關何彥德也昔殷浩亦嘗作豫章定省送別者甚眾及廢徙東陽舩泊征虜亭積日乃至親舊無復相窺者

選舉志吏部郎中裴行儉始設長名榜列銓注期限等法又定州縣陞降官資高下以為故事長名榜自此始也

考唐人選法取人以身言書判計資量勞而擬官始集而試觀其書判已試而銓察其身言已銓而注各給以符謂之告身

陸柱拜吏部郎表銓衡庶品歷選賓僚既成直素屢薦未登陸

亮忠心裁居敗職自非李重清識李致恬正何以區分管庫式

鑒胥吏

梁顧憲之為吏部郎其祖凱之嘗為吏部於
處中植佳樹曰吾為憲之植耳後果為此職

唐百官志吏部員外郎二人掌文選以三銓之法官天下之材
其投試銓注與流內畧同謂之小選

唐六典吏部員外郎謂之南曹注其曹在銓曹之南常集鄭叔

則制才盛居東之佐禮處司南之重高選髦士以分劇曹

分紀唐吏部郎中二廳先小銓次格式員外郎二廳先南曹次

廢置舊說吏部為省眼

唐書裴度柳公綽俱為判官公綽先入為吏部郎中度以詩別

兩人同日事征西今日君先捧紫泥 裴遵度遷吏部員外

天寶中九流輻輳會府遵度敏識強記精覈時吏事第一

柳公權為司封員外郎入奏帝曰見卿筆蹟久因問用筆法

權曰心正則筆正乃可法矣

劉禹錫碑常陟字商衡為吏部員外郎是曹在南宮為眉目在

選士為司命公執直筆閱簿書紛拏盤錯一瞬而剖

唐書王徽
轉考功員

外即時考簿上中下字朱書吏緣為
奸多有楷改微勸僕射請以墨書

宋書劉珙為吏部員外苦吏為奸一日命張幕設案置令式其

中吏選集者得出入繙閱與吏辨吏無得藏其巧人甚便之

楊誠齋集張栻召為吏部員外郎廟堂用史正志為發運使奪

州縣財賦遠近騷然栻為上言之上曰正志以為非取之民公

對曰今州縣財賦大抵無餘不過巧為之名以取之於民耳上

聞之矍然顧栻曰論此事者多矣未有能及此者如栻之言是
朕假手於發運使以病吾民也閔實如栻言即詔罷之

宋

京鏜字仲達叅政龍茂良薦公于孝宗轉主管官誥院先是茂
良帥豫章日得公牋奏之文奇之曰此汪彥章代言手也在職
兩月詔從臣舉良縣令為法官給事中王希呂以公應書即召
見曰卿議論通明有用材也是日除監察御史

戶部

類聚戶部尚書周之地官卿也漢置尚書郎四人其一人主財
帛委輸成帝置尚書五人其三曰民曹主人吏上尚書事後漢
以民曹主繕脩功作當工官之任吳有戶部魏文帝置度支尚
書守專掌軍國支計又置左民尚書晉初省之有度支皆主算

也惠帝時有右民尚書隋開皇三年改度支民部唐因之宋初
除安燾為戶部尚書元祐元年門下侍郎司馬光欲令戶部尚
書兼領左右曹而舊三司並歸戶部則吏權歸一詔尚書省立
法左右曹錢穀尚書兼總使周知其數量入為出而制國用元
仍唐宋舊置戶部掌民籍貢賦官吏俸祿府庫倉廩歲計支用
權衡度量法式坑冶錢幣寶貨恩賜之事置令史分掌名頭尚
書為之長 隋煬帝始置民部侍郎唐因之後改為戶部龍朔
二年改為司元少常伯咸亨元年復為戶部侍郎宋戶部之職
皆歸三司元豐官制行戶部始總邦計置侍郎二員左曹五案
右曹五案 左戶口案稅賦案農田案檢法案知雜案
右常平案免役案坑場案檢法案知雜案 元仍之置
戶部侍郎 周司徒屬官有下大夫蓋郎中之任也漢尚書郎

一人主戶口墾田吳張溫為戶曹郎魏有左民部曹有農部郎
中又為左人右人皆戶部也隋煬帝除侍字改民部郎唐為郎
中掌戶口田土賦役貢獻蠲免優復媼婚繼嗣之事以男女之
黃小中丁老為帳籍以永業口分園宅均其土田以租庸調歛
其物以九等定天下之戶以為尚書侍郎之貳其後以諸行郎
官判錢穀而戶部度支郎官失其職宋元豐改官制罷三司歸
戶部左右曹而三司之名始泯矣元仍唐宋制置戶部郎中二
人周司徒屬官有上士蓋今員外之任後周依焉隋開皇置
民部員外郎煬帝改民曹承務郎唐改民部員外郎從六品上
掌領天下州縣戶口之事凡天下十道任土所出而為貢賦之
差分十道以總之宋尚書諸司郎中正七品元仍之置戶部員

外郎三人

國朝置尚書及左右侍郎司務照磨

正八品 檢校

品而十三司並設郎中員外主事分理庶務焉

晉書杜預為度支尚書內以利人外以救邊備物置用濟當時
之益者伍拾餘條

梁書劉溉為左民尚書溉美風儀善容止所至以清白自修性
又素儉不動聲色弟洽為御史中丞舊中丞不得入尚書下舍
洽引服親不應有礙刺省評決乃許入溉省亦以兄弟素篤不

能相別也

天中記駁劉氏到姓

南史蔡景歷字茂世入守度支尚書舊式拜官于午後景歷拜
日適逢輿駕幸玄武觀在位皆侍宴宣帝恐景歷不預特令早
拜其見重如此

隋書長孫平字處均拜度支尚書平見天下州縣多罹水旱百姓不給奏令民每秋家出粟麥一石已下貧富差等儲之閭巷以備凶年名曰義倉

唐書王琚佐明皇平內難為戶部尚書帝於琚眷委特異預大

政事號內宰相太宗幸翠微宮授司農卿李緯民部尚書房玄

玄齡聞李緯拜尚書如何對曰但云李緯好鬚更無他語太宗遽改授綿州刺史

張鷟集虞書五教實委司徒之班周禮六卿爰開地官之位莫

不織成都邑編緝氓黎設九土之網維成四方之管轄班固申

犬牙之制疆場綺分應璩論馬齒之規井田麟次戶標九等俱

陳萬國之圖人有十倫並掛三年之籍注西都賦曰疆場綺分

云原隰龍麟之次應璩詩曰九州相錯雜相次如馬齒制掌

司徒之拜教制民曹之地征綜事帥寓居其要會幹時通才婚可典領裴珀制及領地官且司邦賦會計事劇出納孔殷操利刃而皆虛委

焚絲而必理

李嶠讓地官尚書表八座樞機五曹要劇上儀七星之象旁理

邦之教自非元凱之明允忠肅陳韓之敦璞淳深將何以釐

正版圖擾安邦國隋開皇改度支為民部唐永徽復改為戶部初戶部居禮部之後武后改置天地四時之

官以戶部為地官由是禮部前

因話錄常燠辭判戶部歸謂甥姪曰已讓版使矣分紀畢構遷戶部尚書開

元四年遇疾上手疏方以賜之時議戶部尚書為凶官遷改授太子詹事與有瘡瘳尋卒

長編李常字公擇為戶部尚書常文士少吏幹或疑不勝任以

問司馬光光曰使此人掌邦計則天下知朝廷非急於征利貪

吏望風培克之患庶幾少息常為戶部尚書作元祐會計錄三

十卷 韓忠彥字師朴召為戶部尚書時元祐會稽錄初成入狹而用廣忠彥憂之因言歛節財用遂裁省冗費置局於戶部

六典唐戶部侍郎有二員判使按者別一署謂之左戶元和後選舉華重宰相多由此進崔群既相孟簡代之

舊唐書盧承慶思道孫也美風儀有才幹太宗奇其明辨累拜民部侍郎太宗嘗問歷代戶口多少之數承慶叙夏殷以後迄于周隋皆有依據

李絳為戶部侍郎判本司事嘗因次對憲宗曰戶部比有進獻至卿獨無何也對曰將戶部錢獻入內藏是用物以結私恩上聳然益嘉其直

李元絃歷工兵吏三侍郎上令公卿精擇堪為戶部者多薦元絃特授以戶部尚書執政以其資淺乃拜侍郎元絃曰條奏人間利害及時政得失以奏之

唐書楊瑒為戶部侍郎帝嘗召宰相大臣議天下戶版延英殿瑒言利病尤詳帝咨賞於是宇文融建檢脫戶餘口瑒執不便融方貴公卿喑默唯唯獨瑒抗議故出為華州刺史

蘇軾趙瞻可戶部侍郎誥理財正辭禁民為非曰義先王之論理財也必繼之以正辭名正而言順則財可得而理民可得而正自頃功利之臣言政而不及化言利而不及義中外紛然朕益厭之具官趙瞻明於吏事輔以經術忠義之節白首不衰爰自秩宗擢貳邦計將使四方之人知予耆老舊德居此官者蓋有盡徹之意焉

朱元晦與鍾戶侍書前日之爲戶部者爲之詔符檄急郵傳切責提刑提刑下之州州取辦於縣轉以相承急於星火奉行之官如通判事者利於賞典意外督趣無所不至此錢既非經賦常入爲民所逋貫官吏所侵盜而以一歲偶多之數制爲定額責使償之自戶部四折而至於縣如轉圜於千仞之坂至其址而其勢窮矣縣將何取之不過巧爲科目以取之於民耳州又使人持符來逮吏繫治撻擊以必得爲効縣吏不勝其苦日夜相與撼其長官以科率事不幸行之則官得其一吏得其二三並緣爲幾何所不有是則議者所謂督責官吏者乃所以深爲之址而重困天子所甚愛之民也夫吏依公以侵民又陽自稱曰此朝廷所欲得非我曹過也夫愚民安知其所以然者何哉亦相聚而怨曰朝廷不卹我等耳

會典戶部浙江等十三司分掌錢穀諸務有註差者從吏部選授有題差者疏名上請有部差者本部劄委其限或三年或一年或一季而代其各司分轄各省萬曆三年議准以北直隸府州衛所歸併福建司南直隸府州衛所歸併四川司鹽政併山東司在外臨德諸倉併雲南司在內御馬象房等倉歸廣西司崇文許墅等關歸貴州司其在京衛分及各衙門分屬十三司帶管不一

唐制諸郎中不自員外拜者謂之土山頭果毅言其不歷清資便拜高品有似長征兵士便得邊遠果毅也趙謙光遷戶員外賀陵戲詠云員外由來美郎中望不優寧知粉署裏翻作土山

頭光酌陟詩云錦帳隨時設金爐任意薰唯慙員外置不應列
星文

詩註帝維字文紀為戶部郎中善裁剖時員外郎宋之問工詩

戶部二妙唐盧倫為戶部郎中有詩名於貞元中與李端司空曙之徒名為十才子形於圖畫以美其名

世說唐戶部與吏部鄰時吏部移牒令戶部列棘以備交通呂

太一為戶部員外郎荅曰春彼吏部銓總之司當須簡要清通

何必設篋樹棘時賞其清俊魏晉儀注魏有嚴部郎中

周禮職金掌凡金玉錫石丹青之戒令漢尚書郎四人其一主

財帛委輸古金部之任也元戶部令史有金科張鷟集太寶曰

位夏陳納貢之書聚人曰財漢有藏錢之府莫不取之以道用

之以時不役人以奉身不遣人以供國自鹿臺重賦東夏為墟

鴻都賣官西園成市

曲阜陳絃制郎吏文昌之高選司珍民部之劇曹

隋書盧昌衡為僕射祖孝徵所薦遷金部郎孝徵曰吾用盧子

均為尚書郎自謂無愧幽明矣

周地官有廩人下大夫為倉人司祿之長掌九穀之數調賜蠲

食以知足否蓋倉部之任也元戶部令史有倉科元徵之范季

睦制出納必恠有司之常貳上下之價則茫昧者受蔽雜苦良

之質則豪右者受贏惟一惟公乃罔不同唯平唯實乃罔不吉

唐書畢緘為倉部郎中故事要家勢人鄙倉駕二部居之者不

悅緘授之恬然如處美官無異言宰相知之遷職方郎中兼侍

御史知雜孟簡為倉部員外郎王叔文為戶部侍郎簡為

其屬中立正色凝然不附

漢置度支侍郎六朝並有度支郎中掌支度國用租賦多少之數物產豐約之宜每歲計有所出而支其所用元戶部令史有

內外度科張鷟集鳴鶴登朝西京雜記唐考功員外廳事有薛稷畫鶴宋之問為贊含鷄

伏首雜記曹元理善算田筋知二困之米不差升斗轉筋之敏未見稱奇聚米之能無

問播美張蒼之善算國用詎肯留情馮勒之攷計軍儲魯何介

意年支國賦為政之嘉猷歲計軍儲邦家之要務位參計會職

縮度支唐故事度支案郎中判員外判出侍郎總統押案

唐書崔仁師為度支郎中嘗奏度支財物奏數千言手不執本

太宗令杜正倫齎本與仁師對唱一無差殊太宗大奇之

筆談貞觀中勅下度支求杜若省郎以謝眺詩云芳洲采杜若

乃責坊州貢之當時以為笑

宋仍舊制以三司大將軍為都糧料使自開寶六年以著作佐

郎陸光範充改用京官自此始太平興國伍年分諸司馬軍

軍為三院八年以馬軍步軍合為一院雍熙四年命供奉官陳

處晦勾當諸司糧料供奉官魯祚勾當馬步軍糧料自後復分

馬步軍為兩院或以諸司使副分主之端拱二年復以京朝官

主之元令史分掌有糧草科轉運天下糧草急關規畫等事

宋書汪大猷字仲嘉幹辨行在糧料院文書盈几日不給視公

間摘一二無不切中老吏驚嘆謂未有也或言推貨務在藏庫

有羨儲朝旨以委公躬自檢校得其實以對

宋以三司使總邦計元令史分掌有審計科審計天下見在錢

帛可支年月

吳博古審計院廳壁記審計非古官也而原於古古者凡官府皆有要會而財用稍食之會尤詳國初以三司使總邦計司各有院以乘中外泉穀出入之政蓋會計之會也然案牘叢委典者不能偏察而姦容焉淳化三年始用戶部使樊知古奏別其籍復別為院置官專領之以聽稍食之要貳

禮部

類聚禮部尚書唐春官卿漢成帝置尚書四人其四曰客曹主外國夷狄事光武分六曹吏部曹兼掌選舉齋祀事皆禮部也魏尚書有祠部曹宋祠部尚書領祠部儀曹二曹隋為禮部尚書唐因之宋元豐正名除尚書闕元祐六年以梁燾為禮部尚書元仍禮部掌凡禮樂祠祭燕享貢舉釋道四方使客諸驚進

貢犒設帳設之事置令史分掌名頭 隋煬帝初置禮部侍郎唐因之掌策試貢舉及齋祀弘崇國子生等事舊制考功員

外郎典貢舉開元中李昂為進士李權所詆朝議以考功位輕不足以臨多士次年遂以禮部侍郎掌焉宋元豐正名除戶部

侍郎謝景溫為禮部侍郎元仍之 周太宗伯屬官下大夫

蓋郎中之任也北齊有殿中郎儀曹郎殿中掌表疏儀曹掌吉凶禮制皆禮部郎中之職宋元豐正名初除劉摯王子韶為之

建炎二年詔禮部郎官一員兼主客元仍之 周太宗伯屬官有上士今員外郎之任也隋開皇置禮部員外郎煬帝改儀

曹承務郎宋諸司員外郎正七品元仍之 國朝置禮部尚書及左右侍郎司務儀制司祠祭司

東晉而下逮北齊皆有祠部郎後周春官府有典祠

中大夫唐龍朔改司禮大夫主客司正客之職周有之漢置尚書郎四人其一主匈奴蕃
部魏主客左右南北隋為主客郎大精膳司兼設郎中員外主
業改司蕃郎唐龍朔改為司蕃大夫事分理焉

書帝曰咨四岳有能典朕三禮僉曰伯夷帝曰俞咨伯夷作秩

宗夙夜惟寅直哉惟清李絳制宗伯秩禮是為大僚

周禮太宗伯之職掌建邦之天神人鬼地示之禮以佐王建保

邦國

唐書李綱字文紀初仕隋官不進筮之得鼎卦筮人曰君當為
卿輔待易乃如志至唐終禮部尚書

陳叔達字子聰太宗時拜禮部尚書建成元吉嫉害太宗陰行
譖毀高祖惑其言將有貶責叔達固諫乃止至是太宗勞之曰

武德時危難潛構知公有謹言今之此拜有以相答也

高宗謂裴行儉曰卿文武兼資故授卿以二職即日拜禮部尚

書兼檢校右衛將軍北史後魏孝文正馬圈留宋弁兼禮部尚書攝七兵事及行執手曰國之大事在祀

與戎後令卿管攝二曹

僉載禮部尚書祝欽明頗涉經史不閑時務博碩肥腴頑滯多

疑臺中小吏號之為蝮蝮者肉塊無七竅秦穆公時野人得之

張鷟集典朕三禮大舜委於姜夷分勅六卿成王任於彤伯建

茲歲首寔曰春官敦叙九族之親欽若五常之教祀天郊地之

典舉其宏綱朝日夕月之儀撮其機要

北夢瑣言偽蜀韓昭仕為禮部尚書琴棋書算射法悉皆涉獵
李台轂曰韓八座仕藝如折襪線無一條長

南豐擬制昔舜命伯夷典禮后獲典樂至周并為宗伯之任今禮部尚書蓋其任也典畧契為司徒百姓和親燕主賓客遠人畢至

通畧豐稷為禮部尚書哲宗升祔議功臣配饗稷以為當用司

馬光呂公著或者謂二人得罪於哲宗廟或不可用稷曰止論

其有功於時爾如唐五王配享中宗豈非得罪於中宗者哉

高麗貢使請買書籍朝廷以故事盡許之禮部尚書蘇軾言漢

東王求諸子太史公書猶不許今可與乎詔曾經買者許依例

周必大辭禮書并翰苑奏狀竊惟掌禮代言班高選遴國初陶

穀雖嘗兼領然宗伯猶是階官未率屬也元祐中獨蘇軾文章

學問稱此兩職然亦先後迭居不聞並命自紹興至于乾道沈

與求孫近胡交修楊椿汪應辰俱是六卿祇帶兼權學士有以

見名器之重不輕畀附如此今臣至愚極陋無一可取積繇遭

遇徧歷清華

謝除禮書兼翰學表宗伯綴文昌之座已高曳履之班翰學依

華蓋之星尚玷續綸之直當聖主謹持於公器獨愚臣常愧於

私人申謝臣竊考自古豪英之才旋觀當今文學之士或抑厭

草茅之下或陸沉州縣之中瞻城南尺五之天致身無路想玉

階方寸之地通籍幾人况乎出入禁嚴周旋侍從論思獻納日

滿清光杜甫詩及平貞觀初尚書踐台斗

舊唐書韋陟為禮部侍郎陟好接後輩尤鑒于文雖詞人後生

靡不諳練曩者主司取與皆一場之善登其科目不盡其才陟

先責舊文仍令舉人自通所工詩筆先試一日知其所長然後

依常式考覈片善無遺美聲盈路

唐賀知章從太常少卿遷禮部侍郎兼授學士一日併謝訖謁宰臣源侍中曰賀公久著盛名今日一時加二榮命並為學士之光輝雖然學士與侍郎孰為美燕公曰侍郎自皇朝已來為衣冠之華選自非履歷清要望實共美者無以居之雖然終是具員之吏又非往賢所慕學士懷先王之道為縉紳軌儀蘊揚班之詞彩兼遊夏之文學始可處之無愧二美之中此為愈也李揆字端卿乾元初兼禮部侍郎揆嘗以主司取士多不以實其試進士文章請於庭中設五經諸史及切韻本於床而引貢士謂之曰大國選士但務得才經籍請恣尋檢由是旬月之間美聲上聞

崔氏兄弟六人邠鄆凡為禮部五吏部再居光德里構便齋宣宗曰邠一門孝友可為士族法因題曰德星堂後京兆民即其里為德星社

唐書鮑防進禮部侍郎得穆質等時比歲旱策問陰陽侵軫質對漢故事免三公卜式請烹弘羊指當時輔政者右司郎中獨孤恂欲下質防不許曰使上聞所未聞不亦善乎卒致質高第帝見策嘉之

帝純為禮部侍郎取士抑浮華先行實嘗從容奏曰禮部侍郎重於宰相帝曰侍郎是宰相除安得重曰然為陛下揀宰相者得無重乎帝美其言

王起字舉之代錢徽為禮部侍郎掌貢二年得士尤精先是貢

舉猥濫勢門子弟交相酬酢寒門俊造十棄六七及元稹李紳在翰林深怒其事故有覆試之科及起考貢士奏當司所選進士據所考雜文先送中書令宰臣閱視可否然後下當司放榜從之議者以為起雖避是非失貢職也

賈至轉禮部侍郎是歲至以時艱歲歉舉人赴省者奏請兩都分試從之兩都試舉人自此始也

職類唐制擢以公望貳于秩宗豈惟神人之和兼舉孝秀之目

授帝貫之禮侍禮闈儀曹典郊祀之禮獻賢能之書今小宗伯實兼二事非直清公正者不足以處之劉禹錫寄王侍郎放榜詩禮闈新榜動長安九陌人人走馬看一日名聲徧天下滿城桃李屬春官

五代史後唐同光初裴皞拜禮部侍郎前後三知貢舉晉高祖時宰相桑維翰亦成名於皞榜下嘗謁皞於私第皞不迎不送

或問之答曰皞見維翰於中書則庶寮也維翰見皞於私館則門生也何送之有人亦重皞耿介

中興係年錄禮部侍郎曾開知婺州先是秦檜語和議曰此事大係安危開於坐中抗聲曰丞相今日不當說安危止合論存亡爾檜矍然驚其言遂令出守

周必大謝除禮部侍郎表臣聞知人繇乎克哲分職著於周官明三德以有家所以撫五辰而凝庶績佐六卿而率屬所以倡九牧而阜兆民何畏巧言其惟吉士如臣者以一介甚疎之跡荷兩朝特達之知槐市蓬山早塵華選鳥臺鷲掖浸陟要班所期顯黜乃誤殊遷惟宗伯古之清曹惟貳卿今之撫任禮樂自天子出雖上稟於聖謨邊豆則有司存當俯求於故實夫何鄙

朴而許攝承夙夜直哉惟清莫遂夔龍之選文章煥焉可述更
懸班馬之工

洪邁賀西掖賈禮侍啓晉貳春官仍躋內史紫荷挈處光搖萬
玉之班紅藥翻時風動五花之判

會典儀制司分掌禮儀宗封學校貢舉之事 祠祭司分掌郊

廟群祀之典及喪禮曆日方位之事 主客司分掌諸蕃朝貢

接待給賜之事簡其譯伴明其禁令凡百官 恩齋各省土貢

亦隸焉 精膳司掌宴享牲豆酒膳之事會其品數程其出納

膳羞筵宴下程

南史梁武帝問徐勉求一有學藝解朝儀者為尚書儀曹郎勉

曰孔休源識見清通詳練故事帝即日除儀曹郎每建議訪問

前事休源即以此所誦記隨機斷決曾無凝滯吏部任昉常謂之

孔獨誦 齊書孔過為齊尚書儀曹郎屢歲闕禮多見信納上謂王儉曰孔過真所謂儀曹也

劉杳字士深博綜羣書沈約任昉以下每有遺忘皆訪問焉累

遷尚書儀曹郎僕射徐勉以臺閣大儀專委杳焉

唐職林舊說禮部郎中掌省中文翰謂之南宮舍人王鞏見聞

錄神宗與宰執議更官制至禮部郎中曰此南宮舍人非他曹

比可除劉摯 唐彭景直禮部郎制容臺是則僊闕咸推唐授禮部郎制儀曹之任實籍文雄郎吏之選必資時秀

宋王元之詩須知百口掌絲綸禮部百日内須知制誥

石林燕語元豐官制禮部郎中謂之名表郎官別有印名曰名

表郎印大朝會等賀及春秋謝賜衣請上聽政之類宰相率百

官奉表皆禮部郎官之職大觀以後朝廷慶賀事多非常例郎

人集卷五
官不能得其意蔡京乃命中書舍人雜爲之既又不欲有所去
取於是間參取首尾或其一二聯次比成之當時謂之集句表
禮部所撰惟春秋兩謝賜衣表而已

言行錄宋劉敞字原父天子將親大禘于太廟丞相欲加上尊
號公以禮部蕪領名表丞相請撰表公說止之遂上䟽章凡四
天子得公奏曰我意本謂當如此遂斷章表不受公於是忤時
相

唐書李珣爲殿中侍御史宰相韋處厚曰清廟之器豈擊搏材
乎除禮部員外郎

崔澹舉止秀峙謂玉而冠者爲禮部員外郎當時士夫以流品
相尚惟名德者謂之首

帝叔夏授春官員外郎則天將拜洛及享明堂別受制與當時
大儒祝欽明郭山暉撰定儀注衆咸推服之

嶺表錄異劉禹錫爲禮部員外郎方與譯者從容論段文昌入
謁既去譯者謂禹錫曰員外須待十年之後此客入相方轉正
曹郎耳自是禹錫決意連受外官十餘年文昌入相方除禹錫
禮部郎中

續要會禮部郎中員外郎凡講議制度損益儀物則審覆有司
所上之狀以次諮決而質於尚書省

春明退朝錄員外廳爲瑞錦富廳前有大石諸州府送到廢印
皆於石上碎之又祥瑞圖亦掌於員外廳令狄楚元和中任員
外郎有詩曰移石幾迴敲廢印開廂何處送新圖

鄭谷寄同年趙郎中詩仙步徐徐整羽衣小儀澄澹轉中儀注
唐制員外郎謂之中儀主事謂之小儀

魏志徐邈為祠部上言南北郊及論明堂宗廟毀建言皆有證

晉周捨博學尤精義理善誦詩書吏部尚書范雲重其才器言之梁武帝召拜尚書祠部郎禮儀損益多自捨出

南史賀德基世傳禮學祖文發父淹至德基三世為祠部郎德

基於禮記稱為精明時吳郡顧越弱冠遊都下討論無倦與文發相埒故謂發越馬

唐書姚察為尚書祠部侍郎舊魏王肅奏祀天地設官懸之樂

八佾之舞至梁武帝以為事人禮縟事神禮簡古無官懸之文

陳初承用莫有損益宣帝欲備樂付有司立儀以梁武為非時

碩學名儒咸希旨察乃博引經籍獨違群議據梁樂為是當時

莫不慙服

